

Uunga siunnersuut: Kalaallit Nunaanni Inatsisartunut qinersisarneq pillugu Inatsisartut inatsisaata nr. 9, 31. oktober 1996-imeersup Inatsisartunut qinersisarneq pillugu Inatsisartut inatsisaannut nr. xx, xx xx-meersumut allanngortinneqarnissaa (Qinersisussat allassimaffiannut ilanngunneqarnissamik killiliussap sap.ak. arfinilinniit sap.ak. pingasunut allanngortinneqarnissaa)

Saqqummiussissut

(Nunamut namminermt, Pinngortitamut Avatangiisinullu Naalakkersuisoq)

Naalakkersuisunit matumuuna saqqummiunneqarpoq Kalaallit Nunaanni Inatsisartunut qinersisarneq pillugu Inatsisartut inatsisaata nr. 9, 31. oktober 1996-imeersup allanngortinneqarnissaanut siunnersuut.

UPA 2012-imi immikkoortoq 65-ip ataani Inatsisartunut ilaasortaq Andreas Uldum saqqummiussivoq Kalaallit ilinniagaqartut, ilinniarnissartik siunertaralugu nunanut allanut nuukkalarsimasut Inatsisartunut qinersinerni qinereqataasalernissaasa sulissutiginasuarnissaat pillugu Naalakkersuisut peqquneqarnissaannik Inatsisartut aalajangiiffigisassaattut siunnersuuteqarluni.

Tamanna tunngavigalugu inatsisinut ataatsimiititaliap ilaasortaasa tamarmiusut isumaqataaffigivaat kissaatiginartillugu, ukiaanerani ataatsimiittoqalerpat Naalakkersuisut Kalaallit Nunaanni Inatsisartunut qinersisarneq pillugu Inatsisartut inatsisaata nr. 9, 31. oktober 1996-imeersup allannguutissaanik siunnersuuteqassasut, taamaasilluni inatsisip § 20-ani, imm. 5-imi sapaatip akunnerinik 6-inik piffissaliisimaneq sapaatip akunnerinik pingasunik allanngortinneqarluni.

Naalakkersuisut inatsisissatut siunnersuut una aqutigalugu kalaallit ilinniagaqartunut periarfissiisinnaagamik nuannaarutigaat.

Taamatut oqaaseqarlunga immikkoortoq pineqartoq Inatsisartuni suliassanngortippara.